

如來示教勝軍王經

唐三藏法師玄奘譯

如是我聞一時薄伽梵在室羅筏住逝多林
給孤獨園與其無量大苾芻衆天人等俱爾
時憍薩羅主勝軍大王尊位威德皆悉成就
爲欲瞻仰請問佛故嚴駕出城往如來所乘
至下處步進入園遙見世尊坐一樹下端嚴
殊妙諸根閑寂其心晏然已能善得最上調
順寂止究竟已能善到第一調順寂止彼岸
善能密護降伏諸根爲丈夫龍丈夫牛王丈

夫良馬清淨無撓如澄泉池威德熾盛光明
照耀如大金山有三十二大丈夫相圓滿莊
嚴八十隨好間飾支體時勝軍王遙見佛已
心喜踊躍不能自勝便即脫去刹帝利種灌
頂大王隨身所有五標尊飾一者頂上寶冠
二者所執神劔三者衆寶傘蓋四者末尼扇
拂五者織成寶履既去是已詣如來所到已
頂禮世尊雙足右繞三匝退坐一面爾時勝
軍大王坐一面已而白佛言大悲世尊惟願
如來哀愍教授惟願善逝哀愍教誡令我長

夜證於大義利益安樂爾時世尊告大王曰
善哉善哉大王汝今乃能請問如來如是大
義大王汝今爲大國主應以正法勿以邪法
應隨法行勿隨非法所以者何大王當知若
有國王或諸王等棄捨正法以諸邪法而作
國王彼於現在爲諸聖賢之所訶毀後致憂
悔身壞命終墮諸惡趣生地獄中受諸劇苦
又若國王或諸王等棄捨邪法以其正法而
作國王彼於現在爲衆聖賢之所稱讚後無
憂悔身壞命終超昇善趣生諸天中受諸妙

樂大王譬如父母憐愍於子心常欲令離苦
得樂王亦應爾於諸國邑所有衆生僮僕作
使輔臣僚佐應以諸佛所說四攝而攝受之
何等爲四一者布施二者愛語三者利行四
者同事如是善攝國邑衆生僮僕作使輔臣
僚佐攝於二義同事同歸何等二義一者現
在二者未來大王當知譬如男子或諸女人
於其夢中夢心所見可愛園林可愛山谷可
愛國邑并諸異類彼夢覺已所見皆無如是
大王國祚身命虛偽無常一切皆如夢之所

見大王當知王富貴樂王自在樂王愛欲樂
及餘所愛諸欲樂具所謂象馬車步諸軍宮
殿后妃太子諸王輔臣僚佐防衛士眾父母
兄弟姊妹妻妾男女大小僮僕作使國邑衆
生金銀珍寶末尼真珠衣服財穀庫藏等物
如是所有諸欲樂具於命終時皆當棄捨獨
往後世無一相隨大王當知如上所說一切
樂具非常非恒不可保信皆變易法迅速不
停流轉移動終歸壞滅念念遷謝後爲灰燼
究竟同趣滅盡之門是失壞法有諸怖畏有

諸灾橫多諸愁惱皆是墜墜零落斷壞離散
之法亦復如是大王當知譬如樹林先見開
華尋復結果後還無果先見其葉榮茂青翠
尋復萎黃後皆凋落如是大王國祚身命王
富貴樂王自在樂王愛欲樂及餘所愛諸欲
樂具所謂象馬車步軍等廣說乃至皆是墜
墜零落斷壞離散之法亦復如是大王當知
如大火聚先見熾然復極熾然轉遍熾然後
皆洞然雖久熾盛終歸滅盡如是大王國祚
身命王富貴樂王自在樂王愛欲樂及餘所

愛諸欲樂具所謂象馬車步軍等廣說乃至
皆是墜墮零落斷壞離散之法亦復如是大
王當知如日月輪有大神用具大勢力放大
光明以自莊嚴遍照世間終歸隱沒如是大
王國祚身命王富貴樂王自在樂王愛欲樂
及餘所愛諸欲樂具所謂象馬車步軍等廣
說乃至皆是墜墮零落斷壞離散之法亦復
如是大王當知譬如大雲遍覆虛空暴風疾
雷掣電注雨震動天地須臾散滅如是大王
國祚身命王富貴樂王自在樂王愛欲樂及

餘所愛諸欲樂具所謂象馬車步軍等廣說
乃至皆是墜墮零落斷壞離散之法亦復如
是是故大王應善勤修隨無常觀隨盡滅觀
於自命終常當驚懼爲大國王應以正法勿
以非法應隨法行勿隨非法大王當知如四
大山從四方來牢固堅密無有缺漏無諸間
隙周而充遍總一合成上盡虛空下窮地際
其中所有一切草木枝條華葉及諸有情蠢
動之類皆被磨滅難以決勇而可逃避難以
勢力而能抗拒難以呪術財貨藥物而可禁

止如是大王世有四種大怖畏事各來磨滅一切衆生難以決勇而可逃避難以勢力而能抗拒難以咒術財貨藥物而能禁止云何四種大怖畏事大王當知一者老來逼害磨滅衆生少壯二者病來逼害磨滅衆生調適三者死來逼害磨滅衆生壽命四者衰來逼害磨滅衆生興盛大王當知譬如師子爲衆獸王入鹿羣中搏取一鹿若獸未斃自在無難其鹿爾時先所騰勇入師子口無復能爲如是大王一切衆生既入無常師子王口所

有勢力無復能爲大王當知譬如有人勇健多力毒箭所中一切威猛皆悉摧滅如是大王一切衆生剛強佞戾死箭所中無復勢力無復救護無所歸依無所投竄臨欲捨命解支節時血肉枯竭心胃熱惱焦渴所逼張口大息手足紛亂無所堪能無有勢力涎涕交流大小便利穢汚身體六根閉塞喉嚨哽咽喘息逾急良醫拱手棄諸妙藥其所飲斃美味珍饌無不悉捨偃卧牀枕臨往異趣淪沒無繫生老病死無常暴流至臨終位餘命無

幾業有刃故後有現前甚大怖畏琰魔王使
廣大黑闇夜分所吞出息入息最後將滅唯
獨一身無有第二及餘伴侶奄背此生歸於
後世是大移轉趣大叢林入大黑闇遊大曠
野泛大溟海業風所飄往無標記冥漠方所
當於爾時無異救護無異歸依無異投竄唯
除正法大王彼於爾時唯有正法能為救護
能為宮室能作歸依是所奔趣是所投竄能
拔衆生出生死苦大王當知譬如有人寒苦
所逼惟有煖火日光衣等所能止息而可獲

安熱苦所逼唯林泉等若涉遠道惟清涼陰
若渴所逼惟清泠水若飢所逼惟多美膳若
病所逼惟良醫藥及供侍者若怖所逼惟強
伴侶如是大王一切衆生死箭所中無復勢
力無復救護無所歸依無所投竄臨欲捨命
解支節時血肉枯竭心胃熱惱焦渴所逼張
口大息手足紛亂無所堪能廣說乃至彼於
爾時唯有正法能為救護能為宮室能作歸
依是所奔趣是所投竄能拔衆生出生死苦
所以者何大王當知如是身者雖加守護雖

久洗飾雖以衆多上妙飲食恣意飽滿及至
臨終要當不免飢渴所逼而便捨命大王當
知如是身者雖常澡浴塗香末香熏香華鬘
隨意嚴飾由此自體穢漏成故臨捨命時終
必歸於不淨臭穢大王當知如是身者雖以
種種上妙衣服覆蔽纏裹由此自身諸不淨
物所合成故於命終時要當不淨種種流出
大王當知如是身者雖處宮室后妃妹女內
宮美人眷屬圍繞作衆妓樂種種倡妓以自
娛樂歡喜快樂臨命終時自見惡相要當驚

怖憂悲苦惱大王當知如是身者雖處宮室
綵飾塗畫殿閣樓臺戶牖軒窓重關密掩種
種香華以自嚴飾種種燈燭增光照明施設
珍奇屏障帷幄燒衆名香散諸妙華香華寶
瓶處處陳列安置種種金銀瑠璃眾寶牀座
敷設上妙氍毹十一錦繡文褥華氎牀座十兩頭俱
置丹枕覆以上妙綺帊錦衾寤寐安寢歡娛
耽著於命終後無所覺知或送屍骸置於葬
所烏鵲鷓鴣狐狼野干餓狗鴟梟諸惡禽獸
爭共食噉骨肉膿血鬚髮糞穢流溢地上臭

處可惡大王當知如是身者先常乘馭香象
駿馬衆寶輦擊鼓吹貝作大音樂衆寶傘
蓋隨侍於後執持扇拂掩映搖動無量勇健
象軍馬軍車軍步軍導從前後防衛左右百
千臣僚竭誠敬奉城邑士庶合掌驚歎雖受
如是勝妙果報自在榮華不久要當瞑目辟
手無復動搖橫尸偃仰喪車輦上衆人荷挽
出大城門父母妻子兄弟姊妹作使僮僕臣
僚輔佐親屬內人隨從左右心纏憂惱頭髮
被散舉手拍頭椎骨悲噎哀感崩慟皆言苦

哉城邑國人覩之號慕隨送葬所或有露尸
施諸禽獸鳥鵲餓狗鷦鷯梟狐狼野干及
諸惡獸擗掣食散骨肉狼籍風飄日曝雨灑
霜封支節解散零落異所或有積薪以火焚
葬筋骨焦爛血肉消化臭煙燄焯四面充塞
火滅骨消灰飛塵散或有掘地埋殞墳陵經
歷多時肉消骨腐大王當知此身如是變壞
無常一切衆生及以諸行皆悉如是非常非
恒不可保信皆變易法迅速不停流轉移動
終歸壞滅念念遷謝後爲灰燼究竟同趣滅

盡之門是失壞法有諸怖畏有諸灾橫多諸
愁惱皆是墜墮零落斷壞離散之法是故大
王應善勤修隨無常觀隨盡滅觀勿為貪欲
之所染汙勿為瞋恚之所鼓動勿為愚癡之
所覆蔽勿復耽染王富貴樂勿復耽染王自
在樂勿復耽染王愛欲樂勿復耽染及餘所
受諸欲樂具應當滅除財命憍逸應當驚懼
無常死魔不與人期奄忽而至為大國主應
以正法勿以非法應隨法行勿隨非法應愍
衆生皆如一子應當至誠護持佛法紹隆三

寶勿復餘顧所以者何生死海中流轉無始
唯佛正法是大津梁千萬億劫實難值故大
王當知我終不說獲得世間諸欲樂具積聚
受用名富貴者我說獲得諸佛正法聖慧財
寶積聚受用乃名圓滿真富貴者是故大王
應當厭離世間所有諸欲樂具應當願求諸
佛正法聖慧財寶時薄伽梵說是經已憍薩
羅主勝軍大王及諸世間天人等衆聞佛所
說皆大歡喜信受奉行
如來示教勝軍王經